



Uunga siunnersuut Peqqinnissaqarfiup iluani napparsimasut naammagittaalliuuteqarsinnaanerit taarsiiffiqeqarsinnaanerallu pillugit Inatsisartut Inatsisaat

(Peqqissutsimut Naalakkersuisoq)
(Siullermeerneqarnera)

Qujanaq inatsimmut pioreersumut allannguutissatut siunnersuuteqarnermut. Pineqartumut ersarissanissaq paasinarsaanissarlu pisariaqarpoq. Maluginiarparput, Naalakkersuisut nassuiaraat, naammagittaalliorsinnaanerup oqilisarnissaa pineqartoq, tamannalu soorunami isumaqatigaarput. Pingaartumik isumaqatigaarput, nunatsinni napparsimasut siunissami naammagittaalliornerminni piffimmut ataasiinnarmut saaffiginninnissaannut periarfissaqalissammat.

Maluginiarparput, peqqinnissaqarfimmi sullinneqarnerup kinguneranik meeqqamik annaasaqarnermut 184.500 koruunik taarsiinissaq siunertarineqartoq. Isumaqarpugut annikippallaartoq. Aningaasat annertussusaat takussutissaannarmik akiliutitut isigineqartariaqarput, isumaqarpugullu aningaasat annertussusaata suliaq imaannaangittorsuaq "puigorneqarniassammat" akiliutitut isigineqartariaqartoq. Aningaasammi amerlassusaat qaffasippat, siunissami taamatut pisoqaqqinnginnissaanut ilungersorluni suliniartoqassaq.

Nalunngilluinnarparput, nakorsat allallu suna tamaat annaassinnaangikkaat. Pinngortitap nukii aalajangiisuujuartussaapput qanorluunniit peqqissutsimut sulisut akisussaasut ilungersorlutik sulitigigaluarpataluunniit annaassiniarnermi ikiuullitik. Tassunga atatillugu pissusissamisoorpoq una aqqutigalugu, angajoqqaanut ilaquataasunullu, meeqqaminnik annaasaqarsimasunut, toqqaannartumik kukkusumik sullinneqarnerup kinguneranik annaasaqarsimasunut, qamuuna iluunngarluta misiginneqataanerput ingerlatissallugu. Qaquguluunniit pisussaannngitsup, inuit nalaatsornerinnakkut ajorluinnartumik eqqorsimavai. Kinaluunniit qaquguluunniit, alianartumik pisumut, imminut pisuutinnngittoorsinnaangilaq. Taamaattumik ilinniutigisariaqarparput. Politikikkut ulluinnarnilu passussisarnermi suliaqartuniit.

Politikikkut ajorluartumik peqqinnissaqarfimmi sulisut tigummiinnarnissaannut suliniarneq pingaartinngippallaarsimavarput, maannakkut malunniuttoq, sulisut ikinnerit ulluinnarni suliassanik amerlanerujussuarnik suliaqartariaqalermata. Tamanna ajorpoq, innuttaasut isumannaatsuunissaat toqqissisimanissaallu isumagisariaqarparput, siusinnerusumiit peqqinnissaqarfiup pingaartininneruneratigut. Amerlanerit massakkutut ingerlaqqinnerat piunasaqaataasut isummerfiginagit soorlu assersuutigalugu nakorsat peqqissaasullu immikkut ilisimasallit aalajangersimasumik atorfeqartut pinngitsaaliissummik soraarniuteqartillugit ineqarniarneq peqqutigalugu attanneqarsinnaangilaq. Perusukkualuarparput, Naalakkersuisut piartumik ineqarnermut aqqissuusseqqinnissamik neriorsuutertik piviusunngortissagaat. Isummersueqataanissamut piareersimavugut, piffissamilu sivisuumi tuavisaarisimalluta. Tamatta akisussaaffimmik uani pisariaqartumik tiguisariaqarpugut.



Ullumi imaappoq, kalaallit nunaanni peqqinnissaqarfimmi naparsimasunut aqqtissiuussisumik/siunnersuisartumik atorfeqartitaqarluni. Naalakkersuisut paragraf-37-apeqqummut¹ akissuteqarput, taanna atassuteqarfigineqarsinnaasoq ulluinnarni nalunaaqutaq 13-15. Taamaakkaluartorli Sullissivik.gl-mi allassimavoq, napparsimasunut aqqtissiuussisoq atassuteqarfigineqarsinnaasoq ullut tamaasa 8-16². Paasissutissaq sorleq eqqortuua? Demokraatinut pingaartuuvoq naammagittaalliornissamut periarfissat eqqortumik nalunaarutiginnissaat, aammalu napparsimasut innuttaasullu nunatsinni illersorneqarnissaat pisinnaatitaaffimminnut tunngatillugu. Isumaqarpugut, napparsimasut pisinnaatitaaffiannik ilisimasakippallaartugut, taakkualu innuttaasut, napparsimasut, peqqinnissaqarfiup taassumalu sulisuisa akornanni pakatsinerujussuarnik isumaqatigiinngissinnaanernilu pilersitsisartut. Napparsimasunut aqqtissiuussisumik atassuteqarfigisassaqaarneq assersuutissatsialaavoq, siunertat piviusumut tulluutinnginnerannut. Naalakkersuisut sakkortuumik eqqarsaasersuutigisariaqarpaat, qanoq iliornikkut pisinnaatitaaffinnut ilisimasat annertusisinneqarsinnaanerat aammalu ersarissuunissaq qulakkeerneqarluni aammalu innuttaasut peqqinnissaqarfiullu akornanni isummersoqatigiissinnaaneq qulakkeerneqarluni.

Naggataatigut Naalakkersuisut allapput, napparsimasunut tunngatillugu innuttaasut pitsaanerusumik isummersoqatigineqarnissaat pilersinniaritsik. Taassuma annertunerusumik nassuiarnissaa erseqqissarneqarnissaalu kissaatigaarput. Naalakkersuisut saqqummiussaata pisariittutut ajornanngitsutullu isikkoqarpoq, inatsisissatulli siunnersuummut oqaaseqaatit pullavigigaanni, nassuiaatinik ernumanaatilinnik imaqarput, erseqqissarusutatsinnik. Asersuutigalugu isumaqarpugut, kalaallit napparsimasut naammagittaalliornissaminnut periarfissagissaannginnerusut, naammagittaalliornissamut maleruagassaq amigaateqartutut isikkoqarmat. Taakku saniatigut allaqqavoq, attuumassuteqanngitsumik nakkutilliisoqanngitsoq allaqqallunilu, naammagittaalliutit suliarineqassasut kalaallinut immikkut tulluussakkamik aammalu piginnaasat apeqqutaatillugit. Kingulleq itisilertikkusupparput.

Ernumassutigaarput, napparsimasut inatsisitigut illersorneqarnerisa takunngitsuusaarneqarnissaat, nassuiaaneq ima paasineqarsinnaammat, pisinnaatitaaffiit tulluussarneqartut, kalaallit nunaanni peqqinnissaqarfiup piginnaasatigut sulisoqarnikkullu appasinnera peqqutigalugit?

Aamma oqallisigiterusupparput, naammannersoq, nunatta nakorsaaneqarfia kisimiilluni nakkutilliisussaataitanera. Ilisimaneqartutut nunatta nakorsaaneqarfia nakkutilliisuvoq, nunattali nakorsaaneqarfiata aamma suliassarippagu peqqinnissaqarfimmi sulisunik aqqtissiuussisuunissaq, nalorninarsititsivoq, ilumut taanna allanut attuumassuteqanngitsumik nakkutilliisutut isigineqarsinnaanersoq. Qanormita Naalakkersuisut isumaqarpat, avataaniit nakkutilliisoqarnissamik suliniuteqartoqarnermut?

Demokraatit tamakkiisumik naammagittaallioriaatsimut eqaannerusumut isumannaatsumullu tapersersuipput, sianigaarpulli naleqqutinngitsoqarsinnaasoq, taamaattumillu siunnersuut

¹ [047_2024_eksem_patientrettigheder_anwa_svar.pdf \(ina.gl\)](#)

² [Send en patientklage \(sullissivik.gl\)](#)



aappassaaneerneqannginnerani ataatsimiititaliami oqaluuserisassanngorlugu ingerlateqqissallugu inassutigaarput.